



# Tir Yimym



Regd. No. RNI. NAGAAO/2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :

Tir Yimym

tiryimym@aolima

tir yimym


TAPAK 8

### Kerala Angh-i state nung tesünep raksatsür: Pinarayi Vijayan

### Odisha Masters: Tanisha aser Dhruv nati tarep temeyoktep asaya kokogo

VOL. XXI NO. 71 (ADOK 71) DIMAPUR TENTONÜ (MONDAY) LUCHII (DECEMBER) 18, 2023 ₹ 5.00

## Kerala nung Covid variant JN.1 putet Israel Army-i Hamas Tunnel tulutiba ngutetogo



Covid-19 putetba aser yimra (influenza) ajanga America health care system nung timtem bentsür arutsü akok ta Center of Disease Control and Prevention (CDCP)-i metetdaksüogo.

Coronavirus indang JN.1 strain ya December 8 nü Karakulam nung RT-PCR-positive sample ka nung puteta liasü.

Arishi küm 79 tain tantsür dak Influenza Like Illness (ILI) agi shirangba yimya liasü aser la ya tesüiba nung Covid nungi taneptsü angur ka lir.

“Iba variant agi shirangertemi temang metaba, neptzü ayimba, terok akongba, tekolak anghoba aser karbo tepinpang ashiba shiogo. Iba variant putetba ajanga nübortem tali kumdangshir saka petsapronga maoksatsüla” ta Ganga Ram Hospital, Delhi nung Senior Consultant in Chest Medicine Dr. Ujjwal Prakash-i ashi.

“Nenok kanga kümdangtsüla. Asenok maoksatsüla aser tanga mapa inyaksü nungdak madoker ama bilemer. Iba variant agi shiranger teimbaka teni aser trok meinprong saka anogo pezü-pungu tsüngda jungadokogo” ta Dr. Ujjwal-isa ashi.

**New Delhi, December 17, 2023 (Agencies):** December 8, 2023 nü Kerala kübok Karakulam nung Covid-19 strain tasen ka putetogo.

Pirola sülen JN.1 strain ya United States aser China nung putetba sülen India nunga putetogo.

December 8 nü Karakulam nung JN. 1 strain putet aser iba ya Pirola (BA.2.86) den medemdangra spike protein indang single mutation dang lir.

JN. 1 ya taoba Omicron strain tem den mesüktepa lir aser iba strain ya melamela menateper aser shirangba yimya terara lir.

Iba Covid strain alirtem temang metaa shiranger, neptzü ayimer, terok akonger, tepinpang ashir.

JN.1 ya mezüng September ita USA nung putet aser December 15 nü China nunga nisung 7 dak puteta liasü.

### India-i Amir of Kuwait nem tetushi agütsü

**Dimapur, December 17, 2023 (TYO):** Kuwait linük nung tekolakba Sheikh Nawaf Al-Ahmad Al-Jaber Al-Sabah December 16, 2023 nü asü.

Iba jagi India sorkari December 17, 2023 nü linük ajungalen Amir of Kuwait Al-Sabah nem tetushi agüja anogo ka state mourning agiogo.

Deobarnü India nung linük wako tom nung dang ayu aser official entertainment kecha maliasü.

Principal Secretary & Home Commissioner Abhijit Sinha IAS ajanga sorkar tetuyuba ka agütsüba nung ajemdaker Nagaland nunga state mourning mongogo.

### Assam Rifles-i Mon district nung civilian 2 kümzük

**Dimapur, December 17, 2023 (TYO):** Nagaland kübok Mon district nung Assam Rifles sepaitemi civilian ana kümzükogo. Tena ya NSCN(K) telungpurtemi pur aoba liasü.

Myanmar nung amenoka aliba NSCN-K (Ang Mai) züngsemtemi December 15 aonung Mon District kübok Yannu yimtsüng nungi nisung ana pur ao.

Telungpurtemi tena ya Myanmar nung tesepe kati anir aotsü sentong liasü. Iba osang angashiba sülen Assam Rifles, Mon Battalion-i rescue operation ka tenzük.

Assam Rifles teloki Mon district kübok Weting yimtsüng anasa arem ka nung telungpurtem menep. Parnok

ya Indo-Myanmar arrtsü adena aotsüba liasü.

Assam Rifles sepaitemi telungpurtem senzüba mita ataba sülen civilian ana kümzüksü atema mapa tenzük aser idanggi parnok tsüngda khatap saka civilian ana kümzük.

AR sepaitemi telungpurtem dang bendanga agütsütsü ashi saka telungpurtemi meyiper injang khaloktsü aser civilian ana yutsür jena ao. Iba tesem nungi M-16 Rifle ka aser Pistol 3 den injangtem ngutetogo.

Iba mapa nung AR sepaitemi civilian ana kümzükba den Over Ground Worker ka apu.

Assam Rifles-i telungpur ket nungi kümzükertem ya Atua Konyak aser Tingkon Konyak na ta jangjaogo. Tenaprong Yannu nung lir.



**Erez, Palestinian Territories, December 17, 2023 (Agencies):** Israeli army-i Gaza Strip nung Hamas nung tunnel tulutiba ngutetogo aser iba ya arrtsü nungi metre noklang ishika dang pilar lir.

Iba tunnel nung gari tilatempo senzüteter ta AFP photographer kati ashi.

Kilometre 4 tema talang tunnel ya Erez border crossing nungi 400 metres (1,300 feet) dang pilar ta Israeli Army-i Deobarnü ashi.

Iba tunnel yangluba nung sen millon aika endokogo aser

küm aika agia yanglu. Iba mapa ya Hamas tekolak Yahya Sinwar tenu Mohamed Yahya-i ketdangsüa inyak. October 7 nü Israel amakba ya Mohamed-i tasa atonga inyak ta bilemer.

Iba tunnel telung nung lenmang aika patepa lir aser iba nung drainage systems, electricity, ventilation, sewage, communication network aser railways lenmangtem lir.

“Iba tunnel nung prangpong-injang aika ngutetogo. Hamas-i iba mapatong nung rongsen aika

endokogo” ta Israel Army spokesman Lieutenant Colonel Richard Hecht-i ashi.

Iba tunnel ya Israel aser sensotem amaksü atema dang yangluba lir, ta pai ashi.

Israel-i Palestine nung mapa inyakertem aser medical teyari nungdakertem aniokba Erez crossing nung iba tunnel ya asaa yangluba lir ta Lieutenant Colonel Richard-isa ashi.

Hamas-i Gaza nung alirtem yaritsü melena Israel amaksü atema ang temulung agütsür ta paisa shisem.

### Manipur CM-i Assam den tesentaktep akangshitsü ayonger

**Imphal, December 17, 2023 (Agencies):** Manipur Chief Minister N Biren Singh-i Manipur aser Assam tsüngda alemli nungi tesentaktep aser sobaliba tesentaktep aliba akangshitsü ayongzükogo.

All Assam Manipuri Youths’ Association-i Manipuri Unity Convention 2023 ayonga amongba sentong nung CM Biren-i Assam nung Manipuri nung shilem agia aruba indang jembi.

“Convention 2023 nung adenba atema kanga pelar. Iba sabang ajanga Assam nung Manipuri nung ta asüba Meitei, Meitei-Pangal aser Bishnupriya nung longjemba nangzükshir” ta Biren-i ashi.

“Nenoki Assam nung Manipur sobaliba senmang wazüka ayuba den ajungketer. Manipur aser Assam tsüngda alemli nungi tesentaktep tajung lir aser külemi yaritepa arur” ta paisa ashi.

Sushil Chandra Dutta-i

züluba kaket “The North-East and the Mughals (1661-1714)”, 1984 nung “Manipur nung Chuba Suhungmung (1497-1539) yimsüsüba mapang Assam chubar kibongi Manipur chubar kibong den kiyimba ajanga tesentaktep liasü” ta züluba lir.

Chief Minister Biren-i Assam semdangi maodang Imphal nung aliba Kangla Fort nungi helicopter ka nung mener apuso aser iba sülen Silchar atong.

### Arunachal CM aser Governor nati taoba MLA Matey tepsetba aitsür

**Itanagar, December 17, 2023 (Agencies):** Arunachal Pradesh kübok Khonsa West constituency nung taoba MLA Yumsen Matey atema Chief Minister Pema Khandu aser Governor Lt. General KT Parnaik nati aitsüogo.

“Taoba MLA Yumsen Matey asüba atema temulung raksar aser iba inyakyim khukhua aitsür. Asür kibong den asükhu lemsateper aser state sorkari par kibong den tejashi lemsateper” ta CM Khandu-i ashi.

December 16 nü Lazu circle kübok Raho yimtsüng nung sentong ka nung Yumsen Matey pur ao. Pa pur aoertemi arrtsüleni anir ao aser tepset.

Arunachal Pradesh Police-i tekaratiba nung aibelenertem pua merenshitsü atema bushisüngdang asütsü tetuyuba agütsüogo.

Yumsen Matey ya Tirap District kübok Olo kin nungi liasü. Pai Arunachal Pradesh Assembly nungi MLA ka ama inyakogo. Paisa Changlang District nung District Adult Education Officer (DAEO) inyakogo.

2009 küm pa mezüng 56 Khonsa West Assembly Constituency nungi MLA ama takok angu. Iba mapang pa Indian National Congress züngsem liasü aser pai Women and Social Welfare, Social Justice and Tribal Affairs Department

tem den DOTCL (Department of Tirap, Changlang, and Longding) atema Parliamentary Secretary inyakogo.

Arunachal Pradesh Governor Lt. General KT Parnaik-ia taoba MLA Yumsen Matey asüba atema mangyimba metetdaksüogo.

Matey asüba ajanga Arunachal Pradesh state aser talisa Tirap atema takoksa tulu bentsür aruogo. Pa ya social activist ka liasü aser jenjang balala nung state atema mapa aika inyaksüogo, ta Governor-i ashi.

Governor Lt. General KT Parnaik-ia Matey tepsetba khukhua aitsü aser aibelenertem pua merenshitsü atema akangakanga metetdaksüogo.

# Losami Baptist Church tenlaki tassenba meshitetogo



Losami Baptist Church indang tenlaki tassenba December 17, 2023 nü meshitetba sentong nung choir temi ken ka atenba noksa nung angur.

**Dimapur, Luchii/December 17 (TYO):** Losami Baptist Church (LBC) indang tenlaki tassenba Rev. Dr. Chekrovei Cho-o, Executive Secretary, Chakhesang Baptist Church Council ajanga December 17, 2023 nü meshitetja liasü.

Iba tenlaki meshitetba sentong ya Neikhwewe Mekrisuh, Associate Pastor LBC lenisüba kübok agi aser LBC pastor Kesowe Mekrisuh-i tekülem sentong agia liasü aser Pholami Baptist Church pastor Vezokho Vezhu ajanga salem o jembi.

Iba tekülem ki yangluba osang

planning committee chairman Neichete K. Tara-i agütsü aser kisüba nung senotsü indokba osang finance committee convenor Kedukhahi Akami-i agüja liasü.

Sentong tenzüka Rev. Thepupa Swiuro, pastor, Chozuba Village Baptist Church ajanga tenüngsang agüja sarasadem aser Rev. Vevotso Thuluo, pastor, Phusachodu Baptist Church ajanga tenla meshiteta sarasadema liasü.

Iba sentong nung CYE Losami, Losami Kohima Unit aser Losami Dimapur Unit nungi

temeja ken tena liasü aser Wewupeu Kepfoh, Associate Pastor (Women) LBC lenisüba nung tepela temaitsü lemsatepba mapan agia liasü.

Sentong nung Rev. Dr. Thupucuyi Khesoh, pastor, Phek Town Baptist Church ajanga Lai azüing aser Rev. Dr. Dingu Kenye, pastor, Lasumi Baptist Church ajanga sentong tembanga sarasadem.

Nikongdang sentong nung Rev. Dr. Kowepe Kanuo, Director, Chakhesang Mission Society ajanga Tsüngrem o jembia liasü.

# 2 buba All Nagaland Open Folk Song & Folk Fusion tetoktepba agi



**Kohima, Luchii/December 17 (TYO):** Kekhrie Krotho ajanga TaFMA den lungjemer Khuzama Village Play Ground nung December 16, 2023 nü "Strings of the past, Melody of the future" omen nung ajemdaker 2 buba All Nagaland Open Folk Song and Folk Fusion tetoktepba agia liasü.

Group Folk Song tetoktepba nung Tsaroho ajanga tematiba jenjang ngutet aser Poimi Students' Union ajanga tanabuba jenjang ngutet.

Solo Folk Fusion tetoktepba nung Sabino Hibo-i mezüngbuba jenjang, Alo Ena-i tanabuba jenjang aser Khrielhoubei Kaimo-i tasembuba jenjang nguteta liasü.

Folk Song category nung mezüngbuba jenjang Atenle Seb aser tanabuba jenjang Menuolhounuo Lese nati ngutet.

Iba sentong nung tesemdanger tongti ka ama jembidang, tejaklen oa aliba linüktem nung rock music aser danga contemporary music tsütsü terenlok lir saka Naga nung folk songs aser fusions nung dangar dang tajungba aser ibaji ajanga pei kibong poksünga

alitsüa maongka angur, ta MLA Dr. Tseilhoutuo Rhütso-i ashi.

Naga nung aluyimba tsütsü zünga-meteter alir nungdakba mapang ka arutsü, anungji iba sentong ayongeritoktepba sentong ayongzüka kisüing masü saka local entrepreneurs aser aluyimer nem parnoki züsentepta sayutsü asoshi sapang agütsüba atema pelar, ta Dr. Rhütso-i ashi.

Tribalism samadakja Nagaland tajungba nung lungjemtsü asoshi inyaksü atema ajungshiba mapang, iba ama tetoktepba ya ajanga kin balala tsüingta tali telungiamba akumtsü aser kin balala telemsa samadaksütsü asoshi mera ka asütsü, ta pai ashi.

Iba sentong nung adenertem pela agizükba o jembidang, local entrepreneurs aser lanurtem nem sapang ka agütsüsü kanga tongtipang ta angateta liasü, ta Chief Event Manager Nunese Sale-i ashi.

Angami, Kuki, Sema aser Rengma nungertem tesem balala nungi süaka kenten-menü meimba nung lungjemer lir, ta pai ashi.

Iba anogo nung Kekhrie Krotho ajanga "Walking the

ancient path" omen nung ajemdaker Khuzama Village Panchayat hall nung Khuzama Experience ayongzüka liasü.

Project Director, TaFMA, Hovithal Sothu-ia iba ama sentong jangratema ayongzüktetba asoshi tenüngsang agütsü aser yimtsüing nung tourism tsütsü terenlok alitsü imlar, ta ashi.

Iba sentong ya ajanga yimtsüing nung nüburtem telungjem aliba sayur, ta pai ashi.

Paisa pei sasa pei peria alitsü kanga tongtipang ta ashi aser nisug ajak dang sorkar mapa kisüing mebushie maongka balala bushitsü ajugshia liasü.

Sorkar mapa angutsü teimla kangabo mali aser zünger mapa mangur tali akumer, anungji takok angutsü asoshi danga lenmang bushitsüla, ta ashi.

Khuzama yimdak tambotising Zakiehol Lüho-i nüngshilong ka nung temoatsü agüja liasü, koba Nunese Sale-i tenla yanglu.

Khuzama Experience mapang parnoki Thukhrezhare, Ezakho, Rikhoba, Khüphito, Hibo Museum, Osa tenem amala semdanga liasü.

# Assam Rifles temi sentong balala ayongzüka

**Dimapur, Luchii/December 17 (TYO):** Assam Rifles temi 1971 rara nung nokinketer tem bilemteta nüburtem, VCCs, ex-servicemen aser Veer Naris tem den December 16, 2023 nü Kohima, Wokha, Phek aser Kiphire district tem nung Vijay Diwas benjongmung ayongzüka liasü.

Iba anogo Kohima aser Phek nung "Run for Fun" sentong ayongzüka liasü, kong civilian 200 shi arua shilem agi.

Iba anogo 1971 rara nung Wokha district nungi raraba sepaitem aser Veer Nari ka den sensaksemba sentong agia liasü. 1971 rara nung asür Sep Ekyimo Lotha, 4 NAGA Bn kinungtsü nem tenüngsang aser tetushi agüja liasü.

Chieswema nung ARPS aser NEIDO nungi kaketshir tem aser sepaitem rally ka nung shilem agia linük meimba yimyim ayima liasü.

Kasa mapang ex-servicemen aser servicemen tsüingta ar atsütepba, medical aid, ex-servicemen asoshi grievances cell aser jazz band display sayua liasü.

Maneni iba anogomung nungtem nung Assam Rifles temi Dimapur nunga No 1 Air Squadron Wing NCC, Dimapur aser Govt College, Dimapur kaketshirtem asoshi 'A Day with Company Commander' sentong ayongzüka liasü.

Iba sentong nung kaketshir 51 aser tesayur ka dena liasü. Iba sentong nung tarur pela agizükba o jembiba, Jazz Band den külemi ken atenba, Assam Rifles movie sayuba aser Quarter Guard semdangba amala inyaka liasü.

Kasa anogo Football Tyre shooting, ar atsütepba, musical chairs aser balloon shooting amala ayongzüka liasü.

# CYE Thenyizumi Baptist Church Hon Jubilee mungogo



Thenyizumi Baptist Church, Christian Youth Endeavour Hon Jubilee nung jubilee choir temi ken ka atenba mapang tangokba noksa nung angur.

**Kohima, Luchii/December 17 (TYO):** Phek district kübok Thenyizu yimtsüing nung Thenyizumi Baptist Church, Christian Youth Endeavour Hon jubilee munga liasü. Iba jubilee mung ya "Alive in Christ" omen nung ajemdaker asemnü munga Deobar nikongdang tembang.

Iba jubilee benjongmung nung o jembirtem ya Rev. Dr. Suluveyi Rhakho, coordinator, Globe Server International, Minneapolis, USA aser Rev. Vemüriyi Vadeo, pastor, Naga Christian Fellowship, Shillong liasü.

Parnoki Khrista den aliba, temelenshi lima nung manokshiba ochi, tanü lanurtem asoshi tayongzükbatem aser maongka, teimla makai aliba mapang teimla aser lanurtem mission mapa amala onoktem nung jembia liasü.

Rev. Dr. Suluveyi Rhakho-i jubilee temoatsü lemsatsü, telungjem aser temeimtep nung alitsü aser Khristan ka ama asendenshir alitsü indang jembia liasü.

Rev. Dr. Rhakho-i mulungsoa tenlaba temoatsü indang onük lemsatepba den lanurtem dang yimya balala nung Tsüngrem o proktsü ajungmesoa liasü.

Pai chichiba Khristan takum

ka ama alitsü ayongzüka jembidang temeim aser Tsüngrem o tajung prokshiba ajanga nisung ka tamang jangjar, ta ashi.

Lanurtemi meranga inyaksü yimya sübatsü indang jembidang, technology renlokba ajanga maongka peria agütsür, ta pai ashi aser mapa asen dangi aru ata mükazüi bushitsüla ta ashi.

Muthasheyi Chotso, chairman CABYF ajanga salem o lemsatepba mapang iba benjongmung ya ajanga nüburtem adenshiba kisüing masü saka tesüiba mapang bilemteta, Tsüngrem temoatsü züingdangtsü mapang ka südaktsütsüla, ta ashi.

Pai lanurtem dang Khrista dak metaloka alitsü ayongzüka aser Pa dak dang asen tekumtet angutsü, ta ashi.

Küm 50 tashi Tsüngremi aochiba aser temoatsü agütsüba bilemteta iba jubilee amungtsüla, ta convenor, jubilee planning committee, Selakhoyi Kapuh-ia ashi.

Iba benjongmung mapang nüngshilong ka azünga Vekhutso Resu-i meshiteta sarasademsü aser Vesakho Thisa, Director, Children & Education Department of CBCC ajanga jubilee souvenir ka sayaja liasü.

# KIBONG KÜMER KÜM 50 ABENSABA TEPELA SALEM



December 18, 1973



December 18, 2023

## Mrs. I Rev. I Yanglu Imsong

Kibubar Kümzüng 1973, December 18 anogo nung kibong tasen ka tenzükba, temoatsü nung aser aika asoshi temoatsü süa arur, tanü 2023, December 18 anogo nung Küm 50 abensaba ya tanga kecha masü saka Tsüngrem taochi ta onoki züngshir, aser Pa dak alang tenüngsang agütsür. Onok asoshi kecha den-a medemdangtsü makokba akümdong, aser aika asoshi longzük tajung ka süa Küm 50 rentetta aruogo. Asüng nungi küm 51 buba nung ayaoka jajadang, nuna nem Tsüngremi arishi talang aser taküm tajung den tematiba temoatsütem agi mola-moshia süngjang ni, ta sarasademtsür.

-Chirnurtem, aser Semchir

### PM Modi-i alima nung office building tulutiba semzüktsüogo



December 17, 2023 nü Surat nung Ato kilonser, Narendra Modi-i semzüktsüba Surat Diamond Bourse building noksa nung angur.

**New Delhi, Luchii/ December 17 (Agencies):** Amongnü Surat yimti (Gujarat) nung Ato kilonser, Narendra Modi-i alima nung office building tulutiba 'Surat Diamond Bourse' semzüktsüogo.

Surat Diamond Bourse ya alima nung diamond shishilembaba tiyongtsü tesem ka akümtsü.

Surat Diamond Bourse semzükba sentong nung jembidang Ato kilonser Modi-i, Surat Diamond Bourse ajanga diamonds industry kanga ajungkettsütsü, ta metetdaksü.

Iba building nung 'Customs Clearance House', Jewellery Mall, International Banking

facility aser Safe Vaults densema lir, ta Modi-i X ajanga metetdaksü.

Tesüiba küm 80 tashi alima nung office building tulutibaji Pentagon liasü, saka tangbo office building tulutibaji Surat Diamond Bourse kümogo. Iba building ya ali sqft 67,28,604 nung amenoka yanglu.

Surat Diamond Bourse ya alima nung International diamond aser sentioset shishilembaba tiyongtsü tesem ka akümtsü.

Iba building ya 15ben tashi amentepa yanglu saka ki temaba tashi tua takdang tatemang tashi aotsü atema minute 5 shi dang agitsü. Iba

building nung 'elevator' 131 lir aser item ajakji control system ajanga dang amshitsü.

Surat Diamond Bourse campus ya sqft 68,17,050 nung amenoka yanglu, tower 9 sendaktepa dang lir aser building ji metong nung metre 81 (feet 265) talang lir. Iba building telunglen storey ana nung gari 4,500 den motorbike/ scooter 10,000 tashi anentettsü. Iba building nung office 4,500 aser mapa inyaker 65,000 alitsü.

Iba building asütsü atema 2015 küm taoba mapang Gujarat Chief Minister, Anandiben Patel-i foundation lung azüngja liasü.

### Bihar nung Hindu nunger putir ka tepsetba sülen tensa raksaogo

**New Delhi, December 17 (Agencies):** Anogo trok tejaklen Bihar nung Hindu nunger putir ka samaa liasü, ajisüaka Amongnü pa tasümgang ngutetogo.

Danapur yimdak aliba Shiva tekülem kidang putir, Manoj Kumar mang nung injang zübo liasü, nükjang aroktettsür aser miim oset rangdoktsür liasü.

Gopalganj district nung pa tasümgang anguba sülen yangji alirtem aser police tsüngda

rara adoka police ana yiruogo aser tensa mejungi lir.

Anogo trok tejaklen Kumar tekülem kidangi aoba mapang samaba sülen nungi police-i pa bushi tenzük saka mangu.

Yangji alirtemi police-i nendaka meinyakba ajanga pa asü, ta tai tonglokja police dak lung agi aon aser police gari rongdoktsüba nungi rara tenzük.

Mezüngbo police-i tensa azüoktsü atema anünglen injang khadoka liasü. Tesülen

Gopalganj Sadar Sub-Divisional Police Officer, Pranjal-i tensaji azüoktet.

Kumar'er adianu aser taoba mapang BJP divisional Tir, Ashok Kumar Shah-ibo, par adianu tepsetba nung ya yimtenren densema lir, ta metetdaksü.

Tang iba tesem nung tensa tamajungba mekümdaksütsü atema police aika yoka lir aser iba tatalokba atema FIR ka benokba sülen ken o bushisüngdang tenzüktsü.

### Maharashtra nung tapoktsü yangluba factory ka nung nisung 9 pokset

**Nagpur, December 17 (Agencies):** Amongnü Maharashtra kübok Nagpur nung aliba tapoktsü yangluba factory ka nung nisung 9 pokset aser asem yiruogo.

Anepdang 9:00 ako meta Nagpur district headquarters nungi kilometer 30 shi pilar aliba Bazaargaon nung aliba Solar Industries factory nung cast booster unit ka apok.

Iba lendong atalokba sülen iba tesem anasa alir nisung 200 shi factory kima adenshir yimiyim ayima longkak ait saka tesülen police-i loktiji senshidaksü.

Yangji alirtem aser takoksa angur kinüngertemi maneni factory kima aliba Amravati-Nagpur lenmang mokdang longkak aita tasümgang meshi.

Maharashtra state sorkari iba lendong nung asür kibongtem shia nem sen lakh pongungu (lakh 5) teyari agütsütsü, ta sangdongogo.

Chief Minister's Office-i sangdong ka ajanga, "Nagpur nung aliba factory nung lendong

atalokba nung nisung asüba atema Chief Minister Eknath Shinde-i mangyim jashi lemsatepogo. Asürtem aser mangyimer kibongtem den tejashi lemsatepba den külemi Chief Minister-isa iba lendong nung asürtem kibong shia nem teyari sen lakh 5 agütsütsü sangdongogo," ta metetdaksü.

"Paisa ketdangsertem dang iba lendong nung yirua alirtem tajungtiba nung yaria treatment agüjang ta tuyuogo," ta kasa sangdong ajanga metetdaksü.

Osangbener den jembidang Nagpur District collector, Vipin Itankar-i, iba lendong atalokba kuliji tang tashi nungbo mejangja, ta metetdaksü.

"Iba factory nung tapoktsü aser drones yanglur, anungji ano lendong matatoktsü atema ketdangsertem aser kümzükba maparen inyakertemi kanga kümdanga inyaksüsa akümer," ta paisa metetdaksü.

"Onoki CCTV noksa repranga bushisüngdangba den külemi forensic tentendangba agitsü, iba sülen ang kuli tejangja metettsü," ta paisa shisem.

Osangbener den jembidang police ketdangser kati, lendong atalokba tesem anasaji tapoktsü kar lir, anungji bomb disposable squads-i dang tapoktsü osettemji agientsü, ta metetdaksü.

Tapoktsü osettem agienba sülen ang tasümgangtemji agitettsü, ta paisa shisem.

Osang angazükba agi, iba factory nungji koila atuba tesem nung amshiba tapoktsütem yanglur aser tanep iba lendong atalokba mapang nungji yangji mapa inyakertemji tapoktsütem taseptsü nung teinokdak mapang liasü.

### Kerala Angh-i state nung tesünep raksatsür: Pinarayi Vijayan

**New Delhi/ Thiruvananthapuram, December 17 (Agencies):** Amongnü Kerala Chief Minister, Pinarayi Vijayan-i, state Angh, Arif Mohammed Khan-i metetsümganga tesünep raksatsütsü meranga tejashitsü otem jembir, ta tai tongloksü.

'Nava Kerala Sadas' sentong dak sendakba nung osangbenertem den jembidang Chief Minister-i, state Angh-i pa melungjang nung bilemba ajak jembir, ta ashi.

Angh-i, longkak aiter Students Federation of India (SFI) zümgsemtem ya ozümg alema inyakertem lir, ta aitsüba olen dak sendakba nung osangbenertemi asüngdangba ka langzüdang Vijayan-i, "Pai (Khan) pa ya Kerala Angh lir ya amadoker," ta ashi.

Vijayan-isa, "Khan-i pa mapatem ajanga metetsümganga state nung tesünep raksatsütsü meranger. Onük ajak nung pai nisungtem jashidaksütsüsa jembir," ta ashi. Khan-i CPI(M) student

wing aser SFI zümgsemtem ya ozümg alema inyakertem, ta aitsüba dak sendakba nung Vijayan-i, "Longkak aitertem anema kechiba pai item ama o amshir?" ta ashi.

Vijayan-i, Angh-i inyakba mapatem aser jembiba otem ajanga inyakyim alema inyakogo, anungji Centre sorkari iba ya reprangshitsüla, ta ashi.

Chief minister-isa, tamalen longkak aitertemi pa danga wako tanak sayudang pai mesüra par minister temibo longkak aitertem jashidaksütsüsa o mejembi, ta ashi.

"Onoki longkak aitertem dang meraratsü dang ajungshir. Onoki gari nungi ayazüka alua parnok den merarar," ta Vijayan-i ashi.

State Angh, Khan-i Universities nung Chancellor tashi amshia BJP-RSS zümgsemtem state nung aliba university balala indang senate nung shimmer, ta tai tonglokja SFI zümgsemtemi pa anema longkak aita arudar.



## TIR YIMYIM YIMOBILEM (EDITORIAL)

DIMAPUR TENTONÜ, DECEMBER (LUCHII) 18, 2023

### Kinungtsü ka dang agitsü

**T**aruba 2024 küm Assam tatar senden mezüing senden amendang tebur kati kinungtsü ka dak tali ayuba sobaliba anendaktsütsü asoshi ozüing kuma latettsü atema ken o benoktsü renema lir. Ibai tebur ka nem tetsür aika kinungtsü kuma magidaktsünüba agi masü saka kin kar nütsüing ajema akümdang kin karbo nütsüing tali tali renlokba tebilemstsü agi lokti tipmatem akümba tamaittsü ka asütsü. Aji oda, ibai tebur atema tetsür agi anüingba tebilemstsüa masü saka kibong ka nung tanur ka mesüra ana dang asotsü merangba mapang, kibong kar nungbo tanur ter metsü sodenadokra, iba jagi küm metsü sülenbo nütsüing teimba kübok nütsüing ishinba purtem timatemstsü ta shisabolua jembiba onük ka lir. Atangji, iba tebilemstsü ya Assam nung dang masü saka talisa Muslim nungertem aliba tesem ajak nung lir, kechiyong tebur kati kinungtsü ka dak tali ayutsü ozüing aser tamangba yimsü agi melabajibo Muslim yimsü ya dang lir. Aji oda, Muslim nungerbo tebur kari khen nung kinungtsü pezü den alitsü akoker aser parnokki tanur ajema asotsü memeranger, anungji Muslim nunger tebur ka kinungtsü pezü rongnungji kinungtsü shia jagi tanur pungongo sora, iba kibong nungji tanur 20 asütsü. Item tanurtemji küm 18 jungerbo election nung vote agütsütsü aser parnok küm metsür semer tsüingda kibong kumadoktsü, anungji ano parnok kibong shia nungji par tsürabur kibong nung ama chirnur soyapoktsü. Iba ama kin ka nütsüing renlokba jenjangji asadangra, küm tenem sülenbo kibong ka chir par 20 dak nungi jakzüka semchirsemnurtem lakh junga renloker alitsü. Iba denji tanga tamangba yimsü Hindu aser asenok ama Khristan-tem kibong nung nütsüing renlokba medemdangra, Muslim nunger ter renlokdang asenok ana renloker asütsü. Aji mamangra, Assam len jagi maoyonga, asen lima nung asenok den alir iba kin kibongtem nütsüing renlokbatem ya asenoki süoki ia sükdangra asenoki angatettsü. Tanü asüing balaka asenokbo tasor dang nungi tasür teimba kümogo. Aji oda, asenoki küm shia asen yimer asüba aser asoba medemdangra, yim aika nung tasoba dang nungibo tasür teimba asütsü. Iba amaisa ao nungbo, küm 70 sülen alima aso 22 bubai ayaokdangbo asenok senso purtem dang nungibo asen kidang aser asen lu nung mapa inyakerem nütsüing teimba asütsü. Ibaji Assam nung Hindu nungertemibo jungjunga sükdangteta lir, ibayongji tang Assam nung tebur kati tetsür ka dak tali kinungtsü magitsü aser mayutsü ozüing latettsü meranger. Assam yimten amaji asenokbo kinungtsü ka dang ayutsü atema tatar senden nung ken o benoka mejembitsüa akok mesüra ozüing melatettsüa akok, saka parnokki asenok dang tarutsü putu atema tekümdangtsü mapa aser wadang tuluka sayuogo. Alima nung ya kin kidong aser tamangba yimsü agi nisungtem longjemdaktsür, anungji kodang kar nütsüing ajemer aser kar züiner ta südir, idangji kari kar kanga mezüingmeshitsüa adoktsü. Atangji, nütsüing züintsüba ya nisung mulung masü, Tsüingrem mulung, kechiyong kinungtsü ka dak tali agiyonga tanur mesora nütsüing merenloktettsü. Ano kibong ka nung tsüraburi junga memesütettsüa tanur sopet asobajia temoatsü agi khuret akümer asütsü. Tanü Muslim limatem aika mesüingjemteti alibaji nütsüing onsaraba ajanga lir. Iba jagi India nung küm aika jakdang nungi kibong shia tanur ka mesüra ana dang ayutsü government-i ajungshia arur. Atangji, asenok Naga nungertem tang nütsüing lakh ter dak tali kuma züinba ya akhidang tsüraburtem kibong nung tanur tuku ter soa mesütetba nungi jakzükbatem lir. Tsürabur mapangbo, tanü ama, ita sen chia mesüra business inyaka tanurtem mesüba masü saka temeyong agi alu anaka inyaka nungi züsenteta mesütetbatem lir. Tanübo asenok ita sen achir aser business tapu balala inyaker, anungji Tsüingremi dang moatsüra asenokibo kibong nung tanur ter-a mesütettsü. Asenok mapaji Tsüingrem metettsüla aser nendaka inyaksüla. Tebur kati kinungtsü ka dang agitsüba sobalibaji asen sobaliba, anungji asenok asoshiibo ozüing balaka menüingdaker, saka nütsüing renloktsübo kanga nüingdaka kümogo.

## OLEMSABANG

### Arogo nem inyaktsü nungloktsüba tongtipang mapa kar

~ L. Kika Pongener.

(Yashi adok nungi...)

**Arogo nung Ministry-temi angatettsü olen kar :**

Arogo ka nung Ministry, Board, Committee, iba amala kongsang kar lir, (Women Ministry, Youth Ministry, Christian Education Ministry, Mission Board, Evangelistic Committee, Social Concern Committee, Property Committee, Naro Committee, Choir) itemji arogo dak sentakba tongtipang kongsangtem lir. Item ajunga jagi nükdang tajung ka-ka ser arogoji nungitra, arogoji tashi-ita alitsü. Item ajunga jagi pei nem nungloktsüba mapalem takok ngua inyaknungdang arogo-ji tashi-ita alitsü. Aji oda, item Ministry, Board, Committee ajunga jagi angateta alitsüba kanga tongtipang kaji, itemji arogo temang nung tenük-telen kaka lir, anungji parnokki arogo dak nungi pilaa balala masü, saka arogo den sentaktepa lir. Aji oda, arogo dak sendakba Ministry, Board, Committee ajunga jagi arogo dak nungi pila-a balala ama angatetra, arogoji tashi maittsü aser telemsa-a adoktsü akok. Tsüingrem oi ashir..."Tenzükba mapa tapu aika lir, saka Kibuba ka dang. Teinyakba mapa tapu-tapu lir, saka Tsüingrem shibai ajak nung lia, ajakji inyaker paji ka dang lir" (1 Korint-12:5-6). "Kechiyong temang kechi koda ka dang sur tenük-telen aika keter, aser temang ka dang, aji oda Khrista lir" (1 Korint-12:12). Anungji item tenük-telen ajunga jagi Yisu Khrista atema aser arogo atema pei pei shilem inyaker...ta angateta tenzüktsüla. Kechiyong arogoji Yisu Khrista temang lir..."Aji oda, Khristai arogoji mesur aser anepalur; Kechiaser asenok pa mang tenük- telen lir" (Efesa-5:30).

**Arogo nungi razüka aortemi angatettsü olen kar :**

Tanü asen lima nung amangbapurtem pei pei adenba lim arogo liaka, ano Para Churches, Ministry, Prayer Center, Fellowship, yamala mesukba aika razüka/tenzüka aoba angur. Aji oda, yamala tenzüka nükjidongji, lim arogotemi mebushijemba santem awajema bushia anir arutsü, aser lim arogotemi mawajemba wadang awajema inyaktsü nükjidong nung tenzüka aor sudi...ta bilemer. Anungji tanü lim arogotem nungi item mesukba kwika razüka/tenzüka oa lir, item ajakji lim arogotem asoshi nükdang tajung ka-ka asütsüla. Aji oda, item ajak jagi lim arogotem den külemi teka amteper, Kibuba'er lu/wadang nung pei pei shilem inyakra, ibajagi Yisu-i arogo nem nungloktsüba, tenyaba mapa, tanela anir aruba mapa aser nutsüngsuba mapa tali tashi taitba, aser wadang tuluba awa-a oa tabensaba inyaktettsü aser idangji Tsüingrem tali sentsüwangshidaktsütsü.

Tanü arogo ajak nung inyaka benshiba mapa tajung rongnung kaji...Ani-asüingba/kiyimba mapa nung, kiyimtsüpurji, yimtsüing balala nungi sura, yimtsüing 'Putu Menden' nungi kin/kidong telembuyim asü masü (?) Küli shiti tejangja zülu-banglo nung meshir külenang, arogo-i ani-asüingba (Engagement) agitsü melar aser sadi külizünga agütsür. Tanü arogotemi iba inyakyim ya ret-reta inyakba agi asen sobaliba-a wazüka ayur aser tamangbaren nunga tashishitsü meli-i asüingteter. Anungji koba arogo nung aser kongsa ani-asüingba/kiyimba külizüing agidir, iba inyakyim ya mezütoki kangasa ret-reta benshitsüla. Kokrabang, kiyimba külizüing yabo mungdangi 'Affiliated & Recognised' asüba arogo nung agiba-ang kanga tajungba asütsü...ta bilemer.

(Maneni asüing adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



Rhoda Jatau aser lar kibong noksa nung angur. Nigeria nung Tsüngrem mezüngmeshiba ken o nung tai tonglokja la anogo 500 dak tema jail nung puoka liasü saka tawa bail nung chiokogo. Iba ken o nung la aitsüra küm 5 tepuokdak ayutsü, ta Khristan melungtet telok ADF International-i metetdaksü. Tamalen Nigeria nung Christian college ka nung azünger, Deborah Emmanuel Yakubu tepsetba aitsüba video ka lai lemsatepa liasü. Iba video ji ajanga lai Tsüngrem mezüngmeshiogo, ta la nem tai tonglokja lir.

## Maharashtra aser Madhya Pradesh na arrtsülen pastor ka apu

**December 17, 2023:** Maharashtra aser Madhya Pradesh arrtsülen sorkar ketdangsertemi pastor ka puogo; pastor jagi tangartem kangshia Khristan yimsü dangi meyipdaksür, ta ketdangsertemi melung melemi apu.

Tawa Burhanpur district kübok Garbedi yimdak Pastor, Gokhariya Solanki den tamangertem kar tekülem sentong tagidak mapang nung RSS züngsem ter dak tema arua timtem agütsü.

RSS züngsemtemi police dang, pastor Solanki-i tangartem kangshia Khristan yimsü dangi meyipdaksür, ta metetdaksüba sülen Nimbola police station nungi police arua Pastor Solanki puer ao.

Osangbener den jembidang pastor-i, "Arrla balala nung ajemdaker kü nem tai tongloksütsü aser jail nung puoktsü atema parnok kanga junga renemer liasü, ajisüaka area nung aliba yimtenren lenir

kati parnok dangi phone call süa ni apuba kuli asüngdang, ibayongji police-i ni chiok," ta metetdaksü.

Küm ter shi tejaklen arrshi küm 39, Solanki-i par jila toktsür Garbedi yimdaki oa Arogo ka tenzüka liasü. Iba yim ya par jila nungi kilometer 80 shi pilar lir. Küm ana tejaklen pai Tenla ki asüba sülen tamangertem yangji adenshia tekülem sentong agia arur.

"Tsüngremi kü dang Tenla ki ka asütsü aser Burhanpur nung aliba nüburttem tenzüksü ni ajungshia liasü. Ibayongji 2014 küm ni yagi aruba sülen tekülem sentong agi tenzüka liasü," ta pastor-isa metetdaksü.

Tangbo iba Arogo nung hopta shia nisung 50 shi tekülem sentong nung adener.

Pastor Solanki apuba sülen pa ghonda asemji police station nungi mechok aser police-i Arogo züngsemtem danga asüngdangyaa liasü.

Arogo züngsemtem jagi police dang, parnok Khristan akümtsü atema pastor-i parnok memesüziük, ta ashi.

Solanki atongsema inyakba Ministry ka nung tongti Sam Kumar-a pa ajurutsü atema Tamil Nadu nungi aru. Solanki amokmerenba dak sendakba nung Sam Kumar-i, "Tarutsü nung parnok (RSS) maneni ozü nüburttem (Khristantem) amokmerenra onoki court nung ken o benoktsü," ta ashi.

Solanki aser pa kinüngtsü na arrshi küm 20 jala ka aser arrshi küm 18 jabaso ka sosema lir. Iba district nung tang mezüng RSS züngsemtemi par kibong amokmerener.

Pa Burhanpur-i maoba mapang Madhya Pradesh nung pa anaben pua liasü aser Maharashtra nunga khen pua liasü.

Solanki-i, amokmeren jenti liaka Laishiba ajanga pa tasü itdaksür aser süneptsür, ta ashi.

## Indonesia sorkari Khristmas mapang Tenla ki malirtem yaritsü

**December 17, 2023:** Indonesia nung sorkar tongti ketdangser kati regional sorkartem dang taruba Khristmas nung tekülem sentong agitsü atema Tenla ki malir Khristantem yariang, ta mepishiogo, ta International Christian Concern (ICC)-i metetdaksü.

Human Development & Culture Minister, Muhajir Effendy-i, teküem sentong agitsü atema yimsü balala amanger ajak dak temeden lir, anungji yaküm Khristmas mapang ama masü saka takümbo Khristmas mapang Khristantemi sadoksadoka külemtsüsü atema Khristantem yaritsüla, ta metetdaksü.

Yaküm Khristmas mapang nung Yisu Khrista asoba

benjungmong amongtsü atema ketdangsertemi Khristantem aser Arogotem nokdanga liasü.

Indonesia nungbo Khristantem aikati sademsadema tekülem sentong magiteter aser Khristantem adenshiba nokdang.

Tesüiba küm jenti Indonesia nung Khristantemi Khristmas mapang timtem balala ajangshi-Khristantem amokmeren, azük mesüra apu.

Minister, Muhadjir-ia tekülem ki malir Khristantem nem tekülem sentong agitsü atema facilities agüjang, ta regional sorkartem dang metetdaksü.

Minister-i, "Nisung shinga bendanga mezüngshitsüla, ajaki kasa service angutsüla. Timtem balala ajanga tekülem sentong

magiteta mesüra facilities melira region shia nung Ministry of Religion office tem ajanga Khristantem yaritsüla," ta metetdaksü.

Sangküm February ita nung national elections agitsü lia Khristantem aikati timtem balala ajurur; Khristan school tem aser Tenla kitem asütsü memelar.

"Indonesia nung Khristantemi timtem majangshitsü aser taruba sorkar tasenbai linük nung yimsü temeden agütsütsü atema sarasademjang. Asen Kümtdakba Yisu Khrista asoba benjungmong Indonesia tesem ajaklen timtem makai mongtetsü atema sarasademjang," ta International Christian Concern-i

metetdaksü.

## ANOGO ABEN TSÜNGREM DEN

### Tekülem

#### Tita 3: 3-8

Nenok temenen atoktsü asoshi nenok temulung meyipang aser nenok nisung shia Kibuba Yisu tenüng nung baptiang. T. Mapa 2:38

Martin Lutheri ashi, "Khristan kati baptiba kuliji yipten jara nung idaka yuang aser iba jagi anepdang shia saker aji angudang pa/la baptiba bilemtetdaksütsü.

Baptiba nung Tsüngremi asenok Par chirtem ama agizüker. Tanur kati obendang dak mesütetba tamaittsü inyakyim mangatetter. Tsüngremer kidang kinü tanur asoshi baptitsübajia lir. Lai/pai amatoktsü akok, saka iba jagi baptiba mapang tongtipangji ajema kümdaksür ta masü.

Baptibaji Tsüngremi asenok par chirtem ama mesütetyim lir. Kodang asenok baptir, Khrista asenok adianu akümer. Asenok Par kibong nung züngsem ka akümer.

Asenok baptibayim jagi aser Tebu teka asenok tsütsü songtoka lir ta ashir. Iba tetezü tekümtetji iba kisüng nungi angutsü ta masü kechiaser pa nungi meyipa aotsü akok saka pai asenok nungi kodang meyipa moatsü. Asenok nungi jena aotsü aser Pa meyong mesüi akümtsü akok saka Pai kodanga asenok nungi jena maouer aser asenok mesentoker.

Pa temeim aser tatok teti asenok tsütsü lir. Kibuba, ni baptiba taochi nung alitsü yariang; Yisu tenüng nung. Amen.

## IDF-i Gaza nung Tenla kidang tetsür ana khaset



Nahida (Um Emad Anton) aser lar jala, Samar na noksa nung angur.

**December 17, 2023:** ta patriarchate-i metetdaksü. December 16, 2023 nü Israel Defense Forces (IDF) sepai kati Gaza nung aliba Holy Family Parish Tenla kidang Patriarchate of Jerusalem-i metetdaksü.

IDF sniper kati khasetba tetsür anaji Palestine tsür Nahida (Um Emad Anton) aser lar jala, Samar na lir.

Latin Patriarchate of Jerusalem-i Cyprus, Jordan, Israel, Gaza aser West Bank nung aliba Catholic Arogotem ketdangser.

Israel aser Hamas tsüngda rara tenzüka mapang nungi Gaza nung Khristan kibongtem teimbaka iba Arogo Tenla kidang jenoka lir.

Tetsür ana- tetsü o jala na Sister's Convent-i aodang tenaprongla khaset; iba dak alia nisung tenet injang agi yiruogo,

"Jelia parnok nem tekümdangtsü memetetdaksü liasü. Arogo kiojen telung nung parnok khaset," ta patriarchate-isa metetdaksü.

IDF indang tanks amshia Tenla kima moapu nung aliba Sisters of Mother Theresa indang Convent-a amak. Iba Convent nung matamabensar 54 jenoka liasü. Tank amshia amakba ajanga Arogo meyong generator, totzü rizünga aliba aser tzi rizünga tanks raksatsüogo.

December 15, 2023 nü UK lawmaker Layla Moran-i, lar kibong züngsemtema iba Tenla kidangji jenoka lir, ta metetdakja liasü.

November 15 nü UK House of Commons nung jembidang lai, iba Tenla kidang jenoka alir lar kibong züngsem kabo süogo, ta metetdakja liasü.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Seplasepshi**

(adv) telemtetba melenshipet melenshiba,o nung teret majang ( flexible, unprincipled )

\* Yimten nung seplasepshi nisung mamshitsüla.

**Selep**

(adv) menendak, mashimashi aliba (insincere, indispline)

\* Nisung kari lokti chiyongtsü kanga selepawazür.

**OLONG PAITEP # 6647**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_\_\_ lu - (3)
- 10. Takdang temalen - (9)
- 11. Tesa \_\_\_ a - (3)
- 13. Ajungbena temulungjang tonglonsü atu - (5)
- 15. Tejen lai nung tesayur - (5)
- 16. Tsüngsak-mopung - (5)

**LANGTSÜNGLEN**

- 1. Reprangdaksü - (4)
- 2. \_\_\_ ur - (3)
- 4. Kiojen yangludak - (6)
- 6. \_\_\_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüng tajemetdak - (6)
- 12. \_\_\_ adenshi - (4)
- 14. Tsünüsenbongtsü adokdak - (3)

**OLONG PAITEP # 6646 TELANGZÜBA**

**TIPIEN :**

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nungjem,
- 25. Sura.

**LANGTSÜNGLEN :**

- 1. Khu, 2. Sùjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja,18. Anünü,
- 19. Taju, 21. Ano, 22. Onü,
- 23. Kua.

**NAI-A YA METETTER MA**



Taiwan nung doctor temi taoba hopta tetsür ka indang tezüngjang nungi lung 300 tema agiteta endokba noksa angur. Arishi küm 20 tain tetsür Xiao Yu ya taoba hopta Chi Mei Hospital nung anioka liasü. La temang metaa shirangba den teberem tsünglanglen tashitsü atuba agi mozü kidang aniok. Doctor temi ultrasound scan agidang la tezüngjang achiji tzü panga waker aliba angu aser iba telung nung kidney stones noklang aika liasü. Lai tzü mejemnüba agi küm aika bubble tea, fruit juice aser alcoholic beverages amala dang jema aru ta doctor dang ashi. La dak ghonda ana tema surgery agidang kidney stone noklang 300 tema agiteta endok ta Surgeon Dr Lim Chye-yang-i ashi.

**Shillong nung NCC nation building camp temogo**



**Shillong, December 17, 2023 (Agencies):** Meghalaya yimtiba Shillong nung anogo 10 nü National Cadet Corps (NCC) nation building camp takok ngua tembangogo.

North Eastern Hill University nung iba camp tembangba sentong nung NCC cadets-i sobaliba shilem balala agia liasü.

NEHU Vice Chancellor professor Prabha Shankar Shukla-i tongti tesemdang ka

ama shilem agi.

Sentong nung ex NCC cadet Lt Gen Sanjay Malik-i tongti tesemdang ama shilem agi aser pai takoker nem sempettem lema agütsü.

“Iba camp ajanga taküm aser lenisüba tesayubatem angazüker aser iba ajanga lanur cadet temi mapang tajung alangzüksü aser taküm piyong atema medemertem yimteter”

ta Lt Gen Sanjay Malik-i ashi. Ek Bharat Shreshtha Bhart

camp ya NCC Directorate North Eastern Region (NER) ajanga ayongzuka agi. Iba sentong nung NCC cadet 600 aden aser parnok ya State 9 (Northeast nungi state 7 den Madhya Pradesh & Chhattisgarh) nungi liasü.

EBSB camp nung lanurtemi sobaliba sentong balala nung shilem agi, Meghalaya kübok tesem aika semdang aser o jembir balala nungi tesayubatem angazuka liasü.

**Alliance Air-i Imphal-Dimapur flight service tenzükshir**

**Imphal, December 17, 2023 (Agencies):** Alliance Air-i Imphal-Dimapur direct flight service tenzükshiogo. October 25, 2023 nü tayimtsü anena ataba sülen December 16 nungi tenzükogo.

ATR aircraft nung passenger 70 menteter aser hopta nung asemben senzütsü. Iba tayimtsü ya anepdang

09:25 ako nung Imphal nungi apusor aser 10:15 ako nung Dimapur atonger. Imphal nungi Hombar, Bodbar aser

Hokolbar anogotem apusotsü.

Külen Dimapur-Imphal-Guwahati flight ya Mongulbar, Brihostibar aser Honibar anogotem senzütsü.

Iba tayimtsü tenzükshiba anogo nung Bir Tikendrajit International Airport nung water cannon salute agüja liasü.

Iba tayimtsü arudang Airport Director C Keishing, Station Manager Angad Mahato, Chief Security Officer W Ranbir Singh aser

Alliance Air staff-i pelashishia agizük.

Kuki lisopur teloktemi mapang shia Imphal-Dimapur Highway (NH-2) mokdang aser iba ajanga Imphal-Dimapur flight service ya kanga tongtipang lir.

Alliance Air-i regional connectivity agütsütsü nangzükba ama Centre sorkar UDAN (Ude Desh Ke Aam Naagrik) kübok Imphal-Dimapur tayimtsü tenzükter ta parnoki metetdaksü.

**Pramod-i aniba UPPL züngsem 46 BPF nung aden**

**Guwahati, December 17, 2023 (Agencies):** Bodoland Territorial Council (BTR) chief executive member Pramod Boro aser Gana Suraksha Party (GSP) ajanga aniba United People's Party Liberal (UPPL) atema tetsükdaksü tulu ka ajuruogo.

December 16 nü Baksha district nung UPPL lennir 46-i Bodo People's Front (BPF) nung aden,

Govardhana Bodoland

Darbar auditorium nung BPF Salbari district committee-i sentong ka ayonga agidang UPPL lennir 46 tashi BPF nung aden.

Iba sentong nung BPF Salbari District Committee In-charge President Khanindra Brahma, UPPL Central Member Kanak Chandra Boro, Salbari District Committee Organizing Secretary Vinod Swargiyari, Jiten Kalita, Treasurer Theron

Selaray, Member Bebika Basumatary aser Shalbari Block Committee Organizing Secretary Mukunda Das nung aden.

Sentong nungsa BPF central general secretary & taoba MLA Maneshwar Brahma, taoba MLA Thaneshwar Basumatary, Youth BPF president & Salbari constituency MCLA Jay Musahari nung den lennir aika aden.



Mizoram Governor Dr. Hari Babu Kambhampati-i MINECO Open Gym, Aizawl nung sentong ka agiang IEC mobile vans 17 tenzüksüba angur. Iba ya Viksit Bharat Sankalp Yatra (VBSY) nung shilem ka lir aser Prime Minister Narendra Modi-i video conference ajanga Rajasthan, Madhya Pradesh, Chhattisgarh, Telengana aser Mizoram atema VBSY scheme tenzüksüba sülen Governor Dr. Hari-i vans sayatsü. Iba sentong nung Secretary, Planning & Programme Implementation Dept. & State Nodal Officer for Viskit Bharat Sankalp Yatra Dr. Lalmalsawma Pachuau den ketdangsurtem aden.

## Libya anasa migrants 60 dak tema tzü nung arakseta asü



**Zuwara, Luchii/December 17 (Agencies):** Libya tükum anasa rong ka raksaba nung migrants 60 dak tema tzü nung arakseta sür alitsü südi ta amanger, ta International Organization for Migration (IOM) ajanga ashi.

Rong nungya nisung 86 shi mener Zuwara yimti yutsür ayameso, ta iba lendong nungi takum jenbur temi UN agency dang Honibarnü shia liasü.

Tzüse tesashi adoka rong ya mubang aser tanur densema migrant 61 samar bushir aser parnok ya sür alitsü südi ta temolung melemi bilemer.

Migrant tem Mediterranean ajanga Europe-i aitsü meranger atema timba Libya nungi aor.

Taküm kisung nunga iba tzüyim ajangtsü merangdang nisung 2,200 dak tema tzüyim nung süogo, ta IOM ajanga ashir, anungji ibai alima nung

migration routes tamajungtiba rongnung ka ta züngshir.

Tang tesüsa atalokba lendong ajururtem ya Nigeria, Gambia aser danga African linüktem nungi lir ta osangtem ajanga ashir.

Iba lendong nungi takum jenbur nisung 25 Libyan detention centre kati yokogo aser yangji temang anepalur, ta ashi.

IOM odongtari X (Twitter) nung ashiba agi, taküm iba lenmang nung nisung asüba ajanga tzüyim nung nisung takum kumzüksü asoshi mera peria magiba sayur.

June ita Greece south tsütsü ango apuba rong ka tzüyim telungi aludang nisung 78 asü aser 100 kumzuka liasü.

Aiben rong tila nung migrants tem sünga mener Mediterranean tzüyim ajanga aotsü meranger.

Parnok ya Italy tonger danga Europe linüktem nung alitsü teimla nung pei linük yutsür ayamesor. Parnok ya pei linük nung rara mesüra reshikangshi nungi ajentsü merangertem, aser kar mapa bushia aortem lir.

Taküm Tunisia aser Libya nungi migrants 153,000 dak tema Italy tonga aruogo, ta UN indang refugee agency ajanga ashir.

Honibarnü UK Ato Kilonser Rishi Sunak-i Rome nung Italy Ato Kilonser Giorgia Meloni aser Albania Ato Kilonser Edi Rama den Europe-i ozüng alema migrant tem aruba ajemdaktsütsü asoshi jembishinüa liasü.

Küm tetenzükdang Sunak-i par sorkar asoshi tongtipang teinyaktsü pongu rongnung English Channel ajanga aruba rong tilatem anendaktsütsü ya ka kumdaktsü.

## Israel-i Gaza mozüki amakba bushisüngdangtsü akhanger

**Gaza City, Luchii/December 17 (Agencies):** Gaza north tsütsü Kamal Adwan Hospital nung Israel sepaitemi bulldozer amshia yirur alir densema Palestine nung Health Minister Mai al-Kaila-i tekeraba nung bushisüngdangtsü ajungshir.

Honibarnü doctor aser tenük kuli alirtemi ashiba agi, Israel sepaitemi bulldozer amshia mozüki anasa Palestine nung jenoka aliba süki mükepsatsü aser kar menüngset. October 7 nü nungi tenzüka Israel mitkar temi Gaza amak tenzüker tang tashi lapoka aliba mozüki 11 rongnung Kamal Adwan Hospital ya ka lir.

"Bulldozer amshia nisungtem takum arem. Shibai yamaji inyaktsü? Iba ama mapa tamajung inyaker ajak obendang daki anir arutsüla aser international criminal court dangi anir aotsüla," ta tenük kuli alir kati ashi.

Social media nung video tem prokshiba nunga Kamal Adwan Hospital jakdang nisungtem longsang agi nungbanger menüngba nguogo.

"Bulldozer ajanga mozüki indang ki o jen aika raksatsüogo. Mozüki kima

nisung aser parnok indang süki menüngsa aser nisung 20 shi menüngseta longsang telung nung rema lir," ta osangbener kati Rafah nungi ashi.

Health Minister al-Kaila-i linük balala dang mozüki nung atalokba bushisüngdangtsü aser Gaza nung "war crimes" atalokba senzuka meyutsütsü ajungshia liasü.

Israel army temi mozüki south tsütsü raksatsü aser mozüki nung incubators inoker aliba kinü tanur 12 tajemtsü tzü mesüra chiyongtsü maka yua lir ta lai ashi.

Israel sepaitem ya tangbo mozüki nungi ainshio go aser army temi nisung 90 pua lir ta ashir, aser mozüki telung nung hadir aser raradang amshiba osettsüset ngutet ta ashir.

Israel sepaitemi anogo ishika iba mozüki lungbanger injang-bomb khaloktsüba sülen Mongulbarnü meita ao.

Kamal Adwan Hospital amakba sülen yangji alirtem tetsübo nung lir ta doctor temi ashir.

"Yirur alirtem operations agitsü nüngdaker, saka onoki kecha meinyakteter," ta iba mozüki nung doctor Wafa Albus-i osangbener dang ashi.

"Israel sepaitemi mozüki indang manager apu aser medical staff ajunga dang asüngdangya asü... Parnoki azü (sniffer dogs) amshia. Azü temi wheelchair nung mena aliba tambor ka dak ango," ta lai ashi.

Gaza nung mozüki tulutiba al-Shifa Hospital, koba Gaza north tsütsü lir, yangji Israel sepaitemi amakba sülen iba mozüki nung kecha meinyakteti shibanga lir.

Israel sepaitemi Gaza north len aliba Indonesian Hospital nunga ita ana dak tema bomb poklokja arur meita ao.

Gaza nung mozüki 36 aliba nungi 11 nung dang shiranger aser yirur alirtem tera anepaluteter, ta World Health Organization ajanga ashir.

October 7 nü Gaza nung yimsü asüba Hamas teloki Israel arütsü alema aita Israel nung 1,139 tepsetba den 240 shi pua bener aoba sülen tayang kepzüka Israel-i Gaza amakdang nisung 18,787 takum samatsüogo aser nisung 50,897 yiruja lir.

Kasa mapang Occupied West Bank nunga Israel sepaitemi nisung 297 tepsetogo aser 3,365 yiruja lir.

Iba rara nung October 31 nungi tenzüka Israel sepaitema 121 takum samaogo.

## Houthi puri yokba drone 15 khazüka yokogo

**London, Luchii/December 17 (Agencies):** United States aser United Kingdom nung ketdangsurtemi ashiba agi, parnok indang warship temi Red Sea nung drone 15 tashi khazüka yokogo.

US Central Command (CENTCOM)-i ashiba agi, parnok indang guided-missile destroyer-i, Yemen nung Houthi teloki azüoker aliba tesemtem nung drone tem yokba 14 tashi khazüka yokogo.

Parnokisa, drone khazüka yokba ajanga iba tesem temekt nung aliba rong ka danga meraksa aser nisung yiruba osanga kecha mali.

UK Defence Secretary Grant Shapps-i, Royal Navy destroyer HMS Diamond-i Sea Viper missile ka khalokja drone ka khazüka yok, koba shishilembar rong ka amaktsü asoshi oya liasü.

Kasa mapang nung Yemen nung Iran den sendaktepa aliba Houthi teloki drone aika amshia Israel nung Eilat yimti makogo, ta otongdar Yahya Sarea-i ashi.

Houthi puri Red Sea nung rongtem maneni amaktsü ta

tenangzükba agütsüogo. Gaza amakba anendaktsütsü atema Israel nongshitsü asoshi parnoki iba jenjang agidar.

Israel den sendaka aliba rgontem ajak amaktsü ta tenangzükba agüja Houthis puri ashiba agi, Yemen indang tzüyim nung Israel-i aoba mesüra Israel nungi aruba rongtem ajak amaktsü.

CENTCOM - i s a , Hokolbarnü Red Sea nung shishilembadag amshiba rong asem amakba osang agütsüogo.

Shapps-i ashiba agi, alima ajunga shishilembaba lenmang nung shishilembadag amshiba rongtem Houthi puri amakba ya international commerce aser maritime security amokmerenba ka lir.

"Shishilembaba kecha tetsükdaktsü makai aotsü asoshi UK-i maneni rongtem amakba nokdangtsü asoshi jenjang agitsü," ta pai ashi.

Africa aser Arabian Peninsula tsüngda tzüyim nung senzüba mapang, Norway aser Liberia nungeri aoba rongtem amala container ships aser oil tanker tem amakba mesüra

item rongtem dak missile khaloktsüba ajanga iba tesem nung shishilemba balala amokmerener.

French container shipping line CMA CGM Group-i Honibarnü ashiba agi, Red Sea ajanga aotsü aliba parnok indang rongtem ajak tekümzükba tesemtem nung anena atatsü asoshi tetuyuba agütsüogo.

Hokolbarnü alima nung shipping company tulutiba Maersk-ia, Red Sea nung Bab el-Mandeb Strait ajanga aotsü aliba parnok indang rongtem ajak anena atatsü asoshi tetuyuba agütsüogo. Liberian wako songer aliba khu abenba rong ka missile agi amakba sülen iba tetuyuba agüja liasü.

Germany nung amendaker aliba shipper Hapag-Lloyd-i ashiba agi, parnok indang rongtem Hombarnü tashi Red Sea ajanga meyoktsü atema telemtetba agiogo.

International Chamber of Shipping nungi John Stawpert-i, Al Jazeera dang ashiba agi, Red Sea nung Houthi puri rongtem amakba ajanga alima nung shishilembaba nung

kongshio go.

Stawpert-isa, iba ajanga rongsenketzung nung takoksa kwi ajurutsü mejangja, saka Suez Canal reprangdanga iba ajanga anogoshia USD billion 3 nungi 9 tashi shishilembar anungji takoksa tulu asütsü.

Yemen nung amendaker aliba Houthi telok, shirnoki Yemen nung tesem timba azüoka lir, saka alima kintemi magizüki lir, parnoki Red Sea aser Arabian Sea nung parnok inyakyim dak sendakba nung Oman-i teyongtsü ia alima kintem den sensaksemba nung shilem agidar, ta Houthi otongdar kati ashi.

Iba osang ajanga shirnok den sensak asemer mesüra kong sensak asemer iba indang tejangja memetetdaktsü, ajisüka Houthi puri haihaura akatsü akok ta sayuogo.

Kasa mapang nung US nung amendaker aliba Semafor website-i Honibarnü ashiba agi, Red Sea nung khu abenba rongtem tali amakba dak sendakba nung telangzüba agütsütsü asoshi Houthi telok indang indanga amaktsü asoshi Washington-i asadagdar.

## Odisha Masters: Tanisha aser Dhruv nati tarep temeyoktep asaya kokogo



**Luchii/December 17, 2023 (Agencies):** Odisha Masters Super 100 badminton tournament nung Deobarnü tarep temeyoktep asaya final kanga toktepa asayaba sülen

India nunger tarep Tanisha Crasto aser Dhruv Kapila nati Singapore nunger tarep Hee Yong Kai Terry aser Tan Wei Han Jessica na kokogo.

Arishi küm 20 tain Tanisha aser arishi küm 23 tain Dhruv nati final nung mezüngbuba set mekoki tesülen aliba nungi meyipa arur asaya 17-21 21-19 23-21 agi koka liasü. Final asaya ya ghonda ka ser minute 14 asaya liasü.

Tetsür kija asaya dak alia India nunger asayartem category pezüprongla nung final tongtetogo. Iba asayamung ya BWF World tour calendar nung tatemangbuba asayamung lir.

BWF (Badminton World Federation) World Tour nung World Tour Finals, Super 1000 pezü, Super 750 trok, Super 500 tenet aser Super 300 11 densema lir. Maneni BWF Tour Super 100 level atema-a ranking points agütsür.

Asayamung ajak nung ranking points aser senpet balala agütsür. Super 1000 level nung asayartem nem point aser senpet timba agütsür.

## Kishan South Africa den Test asayamung nung shilem magitsü

**New Delhi, Luchii/December 17 (Agencies):** Iba asayamung atema December 26 nü nungi Kishan melena KS Bharat tenzüka South Africa den Test ana asayatsü aliba nung wicketkeeper-batter Ishan Kishan masayatetsü, ta Board of Control for Cricket in India (BCCI)-i Deobarnü sangdong ka ajanga metetdaksü.

Kishan-i pa jurila maparen ka aliba ajanga iba asayamung nung shilem magitsü asoshi mepeshia asüngdang, koba board-i

agizükogo. Kishan melena KS Bharat shimogo.

Anogo ka tejakdang Mohammed Shami-a iba asayamung nung shilem magitetsü ta sangdongogo, kechiyong pa tetsüng teloktep yiruba tang tashi tajungba maküm lir.


Captain Rohit Sharma shiba South Africa den T20I aser ODI asayamung nungbo masayar, pa Test team nungbo züngoksemogo aser pa

lenisüba nung team asayatsü.

Maneni Virat Kohli-a T20I aser ODI nung masayaba sülen Test asayamung nungbo shilem agitsü.

Test asaya ana atema India team: Rohit Sharma (C), Shubman Gill, Yashasvi Jaiswal, Virat Kohli, Shreyas Iyer, Ruturaj Gaikwad, KL Rahul (wk), Ravichandran Ashwin, Ravindra Jadeja, Shardul Thakur, Mohd. Siraj, Mukesh Kumar, Jasprit Bumrah (VC), Prasidh Krishna, KS Bharat (wk)

## Warne, Muralitharan & Kumble sülen Lyon-ia Test nung wicket 500 agiogo



**Luchii/December 17, 2023 (Agencies):** Deobarnü Perth nung Australia aser Pakistan na mezüngbuba Test asaya Australia-i run 360 agi kokogo. Anogo pezübuba nung Pakistan team-i run 89 dang yanglur asayar ajak out asü.

Deobarnü iba asaya akokba den külemi Nathan Lyon-i Test asaya nung wicket 500 agia

alizüng tasen ka tongtetogo aser pa ya Test asaya nung wicket 500 agiba asayar tibuba aser spinner tem rongnungi pezübuba kümogo.

Lyon-i Pakistan nunger asayar Faheem Ashraf out sütsüba sülen iba alizüng tongteta liasü.

"New South Wales nungi inetba tanur ka asoshi wicket

500 agitsüba ya tamakoktsü ka liasü. Iba alizüng tongtetsü atema kanga meranga inyakogo aser iba atema ni kanga pelar," ta Lyon-i ashi.

Lyon, shiba 2011 küm mezüng asaya liasü pa Ashes nung temola yiruba sülen masayai lir tang iba asayamung nung shilem agidar. Pai tang tashi nung wicket 501 agia lir aser iba format nung pa ya Australia nunger asayartem rongnungi wicket timtiba agiba asayar tasembuba lir.

Deobarnü Australia nunger pacer temi kanga junga asaya aser Pakistan nunger batter tem nem run yanglutsü asoshi maongka magütsü, shirnok run 451 arishia liasü. Mitchell Starc aser Josh Hazlewood nati wicket asemsem agi aser captain Pat Cummins-i tongtibang wicket ka agia liasü.

## 3buba Melityongpang Badminton Tournament tembangogo

**Mokokchung, Luchii/December 17 (TYO):** 3buba Melityongpang Badminton Tournament December 16 nü tembangogo. Iba asayamung ya Melityongpang Badminton, Marepkong-i ayongzük aser Melityongpang Badminton Court nung asaya liasü.

Junior category Shuttlers-i akok aser Stokers pur tanabuba jenjang nung liasü. Senior Category nung Chomp & Stomp aser 2011 mezüngbuba aser tanabuba jenjang nung liasü. Kasa mapang nung Meyanuksung aser Otongdang na nem Most Promising Player aser Player of the Tournament naroküm agüja liasü.

Melityongpang Badminton, Marepkong tir Taliangshi-i

ashiba agi, parnok telok nung züngsem 11 lir aser parnoki tang agi tasembenbuba iba asayamung ayongzüka asayar. Paisa, lanur asayartem bushiteta parnok ajungkettsü atema parnok bendanga agütsür aliba lemsatepba den lanur asayartem ajungkettsü aser parnok rongsenketzung ajanga tetsükdaksü adokbatem bentetsütsübaaji parnok nükjidong lir ta ashi.

Taliangshi-isa, par telok nungi züngsemtem aser kija aser kibong balala aser temeimertemi rongsen agi nongita yariba atema kanga pelaba lemsatep aser iba asayamung ajanga asayar tajungtem anitetsü imlaba lemsatepa liasü.

## FIFA World Cup 2022 nung Messi-i asema tola sen million \$7.8 agi ayok



**New York, Luchii/December 17 (Agencies):** Qatar nung 2022 World Cup asayadang Argentine nunger football asayar mongin Lionel Messi-i asema tola trok sen million \$7.8 agi auction ka nung ayok, ta auction house ajanga Brehostibarnü ashi.

Auction house Sotheby-i ashiba agi, item tola alitsü asoshi bids asem liasü.

Taküm küm tenzüker tang tashinung auction nung sporting memorabilia sen timtiba agi yoktetbaji ibai alitsü, ta ashi.

Qatar nung nisung 80,000 mentetsü akokba Lusail stadium nung December 18, 2022 nü Argentine-i France madak penalties nung 4-2 agi akok, aser Argentine nung Messi ya captain liasü.

"Saisapong otsü nung 2022 FIFA World Cup ya sentong tulutiba rongnung ka lir, aser Messi tasü ita asayaba den

sendaktepa pai 'greatest player of all time' jenjang ngutet," ta Sotheby indang head of modern collectibles, Brahm Wachter-i ashi.

"Item tola trok ayokba ya auction otsü nung kodanga mamashitsü sentong ka lir, aser fans aser collector temi Messi takok marok anguba den sendakteper."

"Iba ama jenjang tulu aketba osettsüset nüburtem dangi bener arua sayua yoktetba ya Sotheby asoshi akum tulu lir," ta ashi.

Ita tetenzüklen Messi ya 2023 atema Time magazine indang "Athlete of the Year" sangdong, shibai Ballon d'Or award ti tashi nguteta aser ali ajak anokshia Major League Soccer indang Inter Miami-i ao.

Arishi küm 36 tain Messi ya Paris Saint-Germain nungi pilaba sülen July ita Miami asoshi mezüng asaya tenzüka liasü.

## BILEMDANGANG

"Aseni meimba osettem asenji shiba-ar ashir."